

四庫全書

子部

欽定四庫全書

冊府元龜卷一百十九

宋 王欽若等 撰

帝王部

選將

傳曰君子聽鼓鼙之聲則思將帥之臣蓋夫總中權之  
任貞出師之律上所注意人之司命故其為重也繇夏  
商而上靡得而詳周官司馬掌九伐之法以詰誅暴慢  
自漢以來或慎簡智勇委之兵柄乃有備物加禮而表

其待遇分閭假鉞而申之委任方面付之經畧諸將稟其節度推擇之難斯可見矣或斷自宸志或薦於公府僉諧而登用推誠以付託曷嘗不奮庸而底績哉

周宣王使大夫尹氏策命程伯休父於軍將行治兵之時使其士衆左右陳列而勅戒之使循彼淮上之旁省視徐國之土地叛逆者故召穆公作常武之詩以美之曰王謂尹氏命程伯休父左右陳行戒我師旅率彼淮浦省此徐土

漢高祖初為漢王王巴蜀時韓信數與蕭何語何竒之

至南鄭諸將道亡者數十人信度何等已數言度計量也上

不我用即亡何聞信亡不及以聞自追之人有言帝丞

相何亡帝怒如失左右手居一二日何來謁帝且怒且

喜罵何曰若亡何也若汝也何曰臣非敢亡追亡者耳帝

曰所追者誰也曰韓信帝復罵曰諸將亡者以十數公

無所追追信詐也何曰諸將易得至如信國士無雙為國

家之竒也王必欲長王漢中無所事信無事用信必欲爭天下非

信無可與計事者顧王策安決顧思念也王曰吾亦欲東耳安

能鬱鬱久居此乎何曰王計必東能用信信即留不能

用信信終亡耳王曰吾為公以為將何曰雖為將信不

留王曰以為大將何曰幸甚於是王欲召信拜之何曰

王素嫚無禮嫚與慢同今拜大將如名小兒此乃信所以去

也王必欲拜之擇日齋戒設壇場具禮乃可王許之諸

將皆喜人人各自以為得大將至拜乃韓信也一軍皆

驚又初攻下外黃西收軍於滎陽楚騎來衆王迺擇軍

中可為騎將者皆推故秦騎士重泉人李必駱甲

重泉縣名

也地理志  
屬左馮翊

習騎兵今為校尉可為騎將漢王欲拜之必

甲曰臣故秦民恐軍不信臣臣願得大王左右善騎者

傅之

傅音附猶  
言隨從者

嬰雖少然戮力戰乃拜中謁者灌嬰為

中大夫令李必駱甲為左右校尉將郎中騎兵擊楚騎  
於滎陽東大破之

後漢光武初赤眉西入關更始使定國上公王匡襄邑  
王成丹抗威將軍劉均及諸將分據河東弘農以拒之

赤眉衆大集王匡等莫能當光武籌赤眉必破長安欲  
乘釁并關中而方自事山東未知所寄以鄧禹沉深有  
大度故授以西討之畧乃拜為前將軍持節中分麾下  
精兵二萬人遣西入關令自選偏裨以下可與俱者於  
是以韓歆為將軍師李文李春程慮為祭酒馮愔為積  
弩將軍樊崇為驍騎將軍宗歆為車騎將軍鄭尋為建  
威將軍耿訢為赤眉將軍左右于為將師將軍

建武元年帝以王霸曉兵愛士可獨任拜為偏將軍并

將臧宮傳俊兵討周建蘇茂明年春帝使太中大夫持節拜霸為討虜將軍

二年帝以赤眉延岑暴亂三輔郡縣大姓各擁兵衆大司徒鄧禹不能定乃遣馮異代禹討之帝送至河陽賜以乘輿七尺具劍勅異曰三輔遭王莽更始之亂重以赤眉延岑之酷元元塗炭無所依訴今之征伐非必畧地屠城要在平定安集之耳諸將非不健鬪然好擄掠卿本能御吏士念自修勅無為郡縣所苦異頓首受命



四年拜馬成為揚武將軍督誅虜將軍劉隆振威將軍  
宋登射聲校尉王賞發會稽丹陽九江六安四郡兵擊  
李憲時帝幸壽春設壇場祖禮遣之

共工氏之子曰修好遠遊舟車所至

足跡所達靡不窮覽故祀以為祖神祖祖也

明帝時鄧禹少子鴻好籌策永平中以為小侯引入與  
議邊事帝以為能拜將兵長史率五營士屯鴈門

竇固為中郎將坐事廢于家明帝欲遵武帝故事擊匈  
奴通西域以固明習邊事拜為奉車都尉與耿忠率萬

二千騎至天山擊呼衍王斬首千餘級

桓帝時橋玄拜將作大匠鮮卑南匈奴及高句驪嗣子伯固竝畔為寇鈔四府舉玄為度遼將軍假黃鉞馮緄為太常會長沙蠻寇益陽屯聚積久至延熹五年衆轉盛而零陵蠻賊復反應之合二萬餘人攻燒城郭殺傷長吏又武陵蠻夷悉反寇掠江陵間荊州刺史劉度南郡太守李肅竝奔走荆南皆沒於是拜緄為車騎將軍將兵十餘萬討之詔策緄曰蠻夷猾夏久不討攝各焚

都城蹈籍官人州郡將吏死職之臣相逐奔竄曾不反顧可愧言也將軍素有威猛是以擢授六師前代陳湯馮博之徒以寡擊衆郅支夜郎樓蘭之戎頭懸都街衛霍北征功刻金石是皆將軍所究覽也今非將軍誰與修復前迹進赴之宜權時之策將軍主之出郊之事不復內御已命有司祖于國門詩不云乎進厥虎臣闕如虓虎鋪敦淮瀆仍執醜虜將軍勉之時天下饑饉帑藏虛盡每出征伐嘗減公卿奉祿假王侯祖賦前後所遣

將帥官輒陷以折耗軍資往往抵罪緄性烈直不行賂  
賄懼為所中乃上疏曰執得容姦伯夷可疑苟曰無猜  
盜跖可信故樂羊陳功文侯示以謗書願請中常侍一  
人監軍財費尚書朱穆奏緄以財自嫌失大臣之節有  
詔勿劾

魏太祖時許褚遷武衛將軍都督中軍宿衛禁兵甚親  
近焉初褚所將為虎士者從征伐帝以為皆壯士也同  
日拜為將其後以功為將軍封侯者數十人都尉校尉

百餘人皆劍客也

文帝黃初中大將軍曹仁薨以蔣濟為東中郎將代領其兵詔曰卿兼資文武志節忼愾嘗有超越江湖吞吳會之志故復授將帥之任

張既為雍州刺史鄒岐為涼州刺史涼州盧水胡伊健妓妾治元多等反河西大擾帝憂之曰非既莫能安涼州乃召鄒岐以既代之詔曰昔賈復請擊郾賊光武笑曰執金吾擊郾吾復何憂卿謀畧過人今則其以便宜

從事勿復先請

明帝太和末遼東叛帝欲征之而難其中領軍楊暨  
舉殄夷將軍田豫應乃使豫以本官督青州諸軍假節  
往討之

高貴鄉公正元二年八月蜀將姜維寇狄道詔以長水  
校尉鄧艾行安西將軍與征西將軍陳泰并力拒維復  
遣太尉司馬孚為後繼

甘露二年七月詔曰今車駕駐項大將軍恭行天罰前

臨淮浦昔相國大司馬征討皆與尚書俱行今宜如舊  
乃令散騎常侍裴秀給事黃門侍郎鍾會咸與大將軍  
俱行

晉文帝時石苞為徐州刺史帝之敗於東關也苞獨全  
軍而退帝指所持節謂苞曰恨不以此授卿以究大事  
乃遷苞為奮武將軍假節監青州諸軍事

武帝時杜預為度支尚書時帝有滅吳之計而朝議多  
違唯預羊祜張華與帝意合及祜病舉預自代因以本

官假節行平東將軍領征南軍師及裨卒拜鎮南大將軍都督荊州諸軍事給追鋒車第二駙馬

武帝咸康元年四月石季龍寇歷陽癸丑帝觀兵於廣莫門分命諸軍遣將軍劉仕救歷陽平西將軍趙裔屯慈湖龍驤將軍路永戍牛渚建武將軍王允之戍蕪湖司空郝鑒使廣陵相陳光率衆衛京師

簡文帝時殷浩為揚州刺史石季龍死胡中大亂朝廷欲遂蕩平關河於是浩為中軍將軍假節都督揚豫



徐兗青五州軍事浩既受命以中原為已任上疏北征許雒將發墜馬時咸惡之既而以淮南太守陳遠兗州刺史蔡裔為前鋒安西將軍謝尚北中郎將荀羨為督統開江畛田千餘頃以為軍儲

孝武帝時王恭為中書令時孝武將擢時望以為藩屏乃以恭為都督兗青冀幽并徐州晉陵諸軍事平北將軍兗青二州刺史假節鎮京口初都督以北為號者累有不祥故桓冲王坦之刁彛之徒不受鎮北之號恭表

讓軍號以超受為辭而實惡其名於是改號前將軍  
安帝元興初朝廷將伐桓玄以桓氏世在陝西以大將  
軍府司馬桓謙父冲有遺惠於荆楚懼人情向背乃用  
謙為持節都督荆益寧梁四州諸軍事西中郎將荊州  
刺史假節以安荆楚

後魏道武時長孫肥為鎮遠將軍兗州刺史姚平之寇  
平陽帝將討之選諸將無如肥者乃徵還京師遣與毘  
陵王順等將六萬騎為先鋒

太武時來太千為征北將軍鎮雲中帝以其壯勇數有戰功兼悉北境險阻乃以太千巡撫六鎮以防蠕蠕經畧布置甚得事宜

神麤三年七月聞宋將來寇遂詔大鴻臚卿杜超假節都督冀定相三州諸軍事行征南大將軍太宰進爵為王鎮鄴為諸軍節度

司馬文思為廷尉卿宋遣將裴方明擊揚難當於仇池帝以文思為假節征南大將軍督雒豫諸軍南趨襄陽

邀其歸路

文成時源懷拜殿中尚書加侍中參都曹事又督諸軍  
征蠕蠕六道大將咸受節度

孝文太和中堯暄為南部尚書時梁遣其將陳顯達寇  
邊以暄為使持節假中護軍將軍都督南征諸軍事平  
陽公軍次許昌會陳顯達遁走暄乃班師

太和十七年孝文南討詔趙郡王幹司空穆亮為西道  
都將時幹年少未涉軍旅帝乃除薛裔假節平南將軍

為幹副軍

宣武時邢巒為安西將軍徵授度支尚書時梁遣兵侵軼徐兗緣邊鎮戍相繼陷歿朝廷憂之乃以巒為使持節都督東討諸軍事安東將軍尚書如故帝勞遣巒於東堂曰蕭衍寇邊旬朔滋甚諸軍舛互規致連戍陷歿宋魯之民尤罹湯炭誠知將軍旋京未久膝下難違然東南之寄非將軍莫可將軍其勉建殊績以稱朕懷自古忠臣亦非無孝也巒對曰賊雖送死連城犬羊衆盛

然逆順理殊滅當無遠况臣仗陛下之神筭奉律以摧  
之乎殄之期可指辰而待願陛下勿以東南為慮宣武  
曰漢祖有云金吾擊郾吾無憂矣今將軍董戎朕何慮  
哉

蕭寶寅以梁武克建業殺其兄弟避害來奔後永平四  
年盧昺尅梁朐山戍以瑯邪戍主傅文驥守之梁遣師  
攻文驥盧昺督衆軍救之宣寶寅為使持節假安南將  
軍別將長驅往赴受盧昺節度賜帛三百疋宣武於東

堂餞之詔曰蕭衍送死連兵再離寒暑卿忠規內挺孝  
誠外亮必欲鞭尸吳墓戮衍江陰故授卿以摠統之任  
仗卿以克捷之規宜其勉歟寶寅對曰讎恥未復枕戈  
俟旦雖無申包之志敢忘伍胥之心今仰仗神謀俯厲  
將帥誓必拉彼奸勅以清王畧聖澤下臨不勝悲荷因  
泣涕橫流哽咽良久於後盧昶軍敗唯寶寅全師而歸  
李平為度支尚書領御史中尉冀州刺史京兆王愉反  
於信都以平為使持節都督北討諸軍事鎮北將軍行

冀州事以討之宣武臨式乾殿勞遣平曰愉朕之元弟  
居不疑之地豺狼之心不意而發欲上傾社稷下殘萬  
民大義滅親夫豈獲已周公行之於古朕亦當行之於  
今今委卿以專征之任必令應期摧殄務盡經畧之規  
勿虧推轂之寄也何圖今日言及斯事因歔歔流涕平  
對曰臣愉天迷其心構此梟悖陛下不以臣不武委以  
摠督之任今大宥既敷便應有征無戰脫守迷不悟者  
當仰憑天威抑厲將士譬猶太陽之消微露巨海之蕩



熒燭天時人事咸在昭然如其稽顙軍門則送之大理若不悛待戮則鳴鼓釁鍾非陛下之事又梁遣其左遊擊將軍趙祖悅偷據西硤石衆至數萬以逼壽春鎮南崔亮攻之未尅又與李崇乖異詔平以本官使持節鎮軍大將軍兼尚書右僕射為行臺節度諸軍東西州將一以稟之如有乖異以軍法從事

楊大眼為中山內史時高肇征蜀宣武慮梁侵軼徐揚乃徵大眼為太尉長史持節假平南將軍東征別將隸

都督元遙遏禦淮淝

孝明時李崇為征南將軍揚州刺史詔曰應敵制變筭非一途救左擊右疾雷均勢今胸山蟻寇久結未殄賊衍狡詐或生詭劫宜遣銳兵備其不意崇可都督淮南諸軍事坐敦威重遙運聲美次為尚書令加侍中後北鎮破落汗拔陵反叛所在響應征北將軍臨淮王成大敗於五原安北將軍李叔仁尋敗於白道賊衆日甚詔引丞相令僕尚書侍郎黃門於顯陽殿詔曰朕比以鎮

人構逆登遣都督臨淮王尅時除翦軍留五原前鋒失利二將殞命兵士挫衄又武川乖防復陷凶手恐賊勢浸淫寇連恒朔金陵在彼夙夜憂惶諸人宜陳良策以副朕懷吏部尚書元修義曰強寇充斥事須捍討臣謂須得重貴鎮壓恒朔摠彼師旅備衛金陵詔曰去歲阿那環叛逆遣李崇令北征崇遂長驅塞北返節榆闕此亦一時之盛乃上表求改鎮為州罷削舊貫朕于時以舊典難革不許其請尋李崇此表開鎮人非冀之心致

有今日之事但既往難追為復畧論此耳朕以李崇國  
戚望重器識英斷意欲還遣崇行摠督三軍揚旗恒朔  
除彼羣盜諸人謂可爾以不僕射蕭寶寅等曰陛下以  
舊都在北憂慮金陵臣等實懷悚息李崇德位隆重社  
稷之臣陛下此遣實合羣望崇啓曰臣實無用猥蒙殊  
寵位妨賢路遂充北伐徒勞將士無勲而還慙負聖朝  
於今莫已臣以六鎮幽垂與賊接對鳴柝聲弦弗離旬  
朔州名差重於鎮謂實可悅彼心使聲教日揚微塵去

塞豈敢導此凶源開生賊意臣之愆負死有餘責屬陛下慈寬賜全腰領今更遣臣北行正是報恩改過所不敢辭但臣年七十自恨老疾不堪敵場更願英賢收功盛日於是詔崇以本官加使持節開府北討大都督撫軍將軍崔暹鎮國將軍廣陵王淵皆受崇節度

高樹生太尉謚之子尚氣俠不仕孝昌初北州大亂詔發衆軍廣開募賞以樹生有威畧授以大都督令率勁勇鎮捍舊藩

周武帝保定四年十月詔大將軍大冢宰晉國公護率軍伐齊帝於太廟庭授以斧鉞於是護總大軍出潼關大將軍權景宣率山南諸軍出豫州少師楊檟出軟關建德二年六月大選諸軍將勗以戎事

梁士彥以軍功拜儀同三司武帝將有事東夏聞其勇決自扶風郡守除九曲鎮將進位上開府封建威縣公齊人甚憚焉

隋高祖時相州王謙構逆帝將擊之問將於高頴答曰

于義素有經畧可為元帥帝初然之劉昉進曰梁睿位望素重不可居義之下帝乃止於是以睿為元帥義為行軍總管

周搖為豫州總管開皇初突厥寇邊燕薊多被其患前總管李崇為虜所殺帝思所以鎮之臨朝曰無以加周搖者拜為幽州總管六州五十鎮諸軍事搖修郭塞謹斥堠邊民以安

源雄為朔州總管深為北人所憚伐陳之役高祖下冊

書曰於戲唯爾上大將軍朔方公雄識悟明允風神果  
毅往收徐方時逢寇逆建旗馬邑安撫北藩嘉謀絕外  
境之虞挺劍息韋溝之望沙漠以北俱荷威恩呂梁之  
間罔不懷惠但江淮叢爾有陳僭逆今將董率戎旅清  
彼東南是用命爾為行軍總管往欽哉於是從秦王俊  
出信州道及陳平以功進位上柱國賜子崇爵端氏縣  
伯褒為安化縣伯賜物五千段復鎮朔州

韓洪為廉州刺史時突厥屢為邊患朝廷以洪驍勇檢



校朔州總管事尋拜代州總管

賀若弼周末為壽州刺史及高祖受禪陰有併江南之志訪可任者高頴曰朝臣之內文武才幹無出賀若弼者帝曰公得之矣乃拜弼為吳郡總管委以平陳之事弼忻然以為已任

李衍為介州刺史朝廷將有事江南詔衍行襄州道營戰船及大衆伐陳授行軍總管從秦王俊出襄陽道杜彥為洪州總管時雲州總管賀婁子幹卒帝悼惜者

久之因謂侍臣曰榆林國之重鎮安得子幹之輩乎後數日帝曰吾思可以鎮榆林者莫過杜彥於是徵拜雲州總管十八年遼東之役以行軍總管從漢王至營州帝以彥曉習軍旅令總管五十營事及還拜朔州總管煬帝大業十年齊郡賊盜孟讓寇掠諸郡王世充大破之帝以世充有將帥才畧復遣領兵討諸小盜所向盡平

唐高祖武德六年八月東南道行臺僕射輔公祐據丹

陽反僭稱宋王遣趙郡王孝恭及嶺南道大使永康縣公李靖討之

太宗貞觀三年十一月以并州都督李世勣為通漢道行軍總管兵部尚書李靖為定襄道行軍總管以擊突厥

八年十二月命特進李靖兵部尚書侯君集刑部尚書任城王道宗涼州都督李大亮等為大總管各帥師分道以討吐谷渾

十三年十二月以吏部尚書侯君集為交河道行軍大總管帥師伐高昌

十八年十一月命太子詹事英國公李勣為遼東道行軍總管出柳城禮部尚書江夏郡王道宗副之刑部尚書鄒國公張亮為平壤道行軍總管以舟師出萊州左領軍常何瀘州都督左難當副之以伐高麗

高宗永徽二年七月賀魯寇陷金嶺城蒲類縣遣武侯大將軍梁建方右驍衛大將軍契苾何力為弓月道總

管以討之

六年五月命左屯衛大將軍瀘國公程知節等五將軍帥師出蔥山道以討賀魯

顯慶二年正月命右屯衛將軍蘇定方等四將軍為伊麗道將軍帥師以討賀魯

四年十一月以邢國公蘇定方為神丘道總管劉伯英為昆夷道總管以伐百濟

龍朔元年五月命左驍衛大將軍涼國公契苾何力為

遼東道大總管左武衛大將軍邢國公蘇定方為平壤道大總管兵部尚書同中書門下三品樂安縣公任雅相為淇江道大總管以伐高麗

乾封元年十月命司空英國公李勣為遼東道行軍大總管以伐高麗

三年正月以右相劉仁軌為遼東道總管

總章二年六月遣右衛大將軍涼國公契苾何力為駕海道大總管三年四月以右威衛大將軍薛仁貴為邏

娑道行軍大總管右衛員外大將軍阿史那道真左衛將軍郭待封為副領兵五萬以擊吐蕃

咸亨五年二月遣太子左庶子同中書門下三品劉仁軌為雞林道大總管以討新羅仍令衛尉卿李弼右領軍大將軍李謹行副之

上元三年三月吐蕃入寇鄯廓河芳四州命雒州牧周王顯為洮州道行軍元帥領工部尚書劉審禮等十二總管并州都督相王輪為涼州道行軍元帥領左衛將

軍契苾何力等軍以討吐蕃二王竟不行

永隆二年正月遣禮部尚書裴行儉為定襄道大總管帥師討突厥

永淳二年十一月命將軍程務挺為單于道安撫大使以招討總管討山賊元珍骨篤祿賀魯等

中宗神龍三年五月以屯衛大將軍兼檢校雒州長史張仁直為朔方道大總管以備突厥

玄宗開元二年四月庚午勅曰大漠南守長河北介地



險可憑天兵有警夏潦方壯冬冰未合料敵安邊存乎  
備預靈武道行軍副大總管右領軍衛大將軍張知運  
神氣雄傑兵謀果斷持軍出塞可使單于喪膽抗敵臨  
邊足令勇夫增氣宜令先持節赴軍簡行處置并緣邊  
州軍兵馬等亦委知運量事均融乃與幽州刺史攝御  
史中丞強修計議便宜支備事訖聽整入京奏事姚崇  
職兼樞劇未要即行副既掌同一依軍令

三年夏四月庚申帝以遺邏祿等部落新歸恐邊境有

虞思建將帥乃下詔曰命彼太師聞乎周頌安得猛士  
欽若漢圖朕懷柔百蠻茂育萬姓綏之則教人息戰靖  
之則去兵不用故獯戎是逐前史嘗載邊郵為亂先王  
必征所以罰其浸驕徵其即叙朔方軍壘接太原之備  
胡右地城池控張掖之遮敵是用誠于師旅揚我兵威  
誰其任之肅此將命右羽林軍大將軍上柱國河東郡  
開國公薛訥左衛大將軍上柱國太原郡開國公郭虔  
瓘等既明且哲緯武經文登壇有大將之容辭第有忠

臣之志或斬其愛子掃塵而清北風或俘其名王却地而盡西海故可以率如羆之勇當非熊之寄然則井陘之間昔不成列河源之路舊多鑿空設險而張遠謀總戎而獻長策俾爾之效在於斯舉固當殲其種落告成於王豈為完我甲兵逸而待寇而已訥可持節充梁州鎮軍大總管赤水建康河源及緣邊州軍並受節度仍與郭虔瓘張知運杜賓客相知共為表裏夙設方畧虔瓘可持節充朔州鎮大總管和戎大武及并州以北緣

邊州軍竝受節度仍與張知運甄道一相知共為掎角  
勿失權宜訥便特於涼州住涼州都督楊執一為副大  
總管虔瓘於并州住并州長史王暉為副大總管宜排  
比兵馬精加教練幽州有事即令虔瓘將和戎兵馬從  
嘗州土門與甄道一計會共討兇逆其同華等兵及精  
騎健兒并鞍馬等依三月十五日制仍令遠探量事續  
遣

十月壬戌制曰古之命將帥訓甲兵所以宣威武而懲

不庭也自非樂卻之裔孫吳之才何以摠中軍而絕大  
漠矣右羽林軍大將軍上柱國河東郡開國公涼州鎮  
軍大總管薛訥家代名將國朝元臣智湧泉源氣橫雲  
電廟堂之上則寬而有謀旗鼓之間則勇而無撓頃者  
單于地隔驕子天亡衆已離心魑魅懸首今則須行弔  
伐用滅逋逃宜憑推轂之權將待覆巢之勢可持節充  
朔方道行軍大總管太僕卿呂延祚謀慮經遠才明沉  
斷右威衛將軍兼靈州刺史杜賓客三軍之雄萬人之

敵以之入幕孰不師滅曾謂出車肅茲王命竝宜充副  
總管

蕭嵩為兵部侍郎時涼州刺史河南節度王君奭家在  
瓜州為吐蕃大將悉諾邏恭祿所攻河隴震駭俄而君  
奭又為回紇諸部所殺朝廷議以大臣出鎮以靜邊隅  
乃拜嵩為兵部尚書河西節度判涼州事嵩乃奏裴寬  
郭虔已牛仙客為判官左金吾衛員外將軍張守珪為  
瓜州刺史邊境獲安軍師屢捷帝大悅制以嵩同中書

門下三品恩顧莫二

天寶十四年十一月范陽節度使安祿山稱兵向闕詔以朔方節度副使兼靈武郡太守御史大夫安思順為戶部尚書弟元貞為太僕卿朔方右廂兵馬使九原郡太守兼西受降城使郭子儀為衛尉卿員外郎置同正員兼靈武郡太守攝御史中丞充朔方節度關內度支副大使知節度事

十五載勅子儀圍雲中收復河朔以朔方節度副使單

于副都護李光弼為雲中太守攝御史大夫充河東節

度副大使知節度事委以東討

代宗實錄載天寶末安祿山反玄宗注意武將

光弼子儀皆蒙召見于內殿並稱旨特拜光弼代祿山為范陽節度使委以東討

肅宗上元二年二月李光弼兵敗於邙山河陽太守魚

朝恩退保陝州三年二月河中軍亂殺其帥李國貞時

太原節度使鄧景山亦為部下所殺恐其合從連賊朝

廷憂之後輩帥臣未能彈壓勢不獲已遂用郭子儀為

朔方河中北庭潞儀澤沁等州節度行營行興平定國



副元帥充本管觀察處置使進封汾陽王出鎮絳州

三月丙申詔曰時屬艱難用勤師旅元帥之任必藉廟  
謀苟非人傑孰允斯寄司徒兼中書令朔方節度副大  
使子儀風雲有感星象降生秉文武之姿懷經濟之器  
自兇狂構禍區宇未寧蘊忠貞以立身資義勇而成務  
加其識度弘遠謀畧冲深張飛乃萬人之敵郝毅是三  
軍之帥故能掃清強寇收復二京建茲大勲成我王業  
雖少康嗣位夏靡贊其功光武中興鄧禹集其事以今

觀古未足多之但以氛祲未清軍戎是急爰求碩德伏以師貞宜承重委克濟多難可充東京畿及山南東道并河南諸道元帥仍權知東京留守

五月丙戌詔曰元帥之任實屬於師貞左軍之選諒資於邦傑自非道申啓沃學貫韜鈴則何以翊分閫而專征膺鑿門而受律求諸將相允得其人司空兼侍中薊國公光弼器識弘遠志懷沉毅蘊孫吳之畧有文武之才往屬艱難備形忠勇叶風雲而經始保宗社于阽危

繇是出備長城入扶大厦茂功懸於日月嘉績被於巖  
廊屬殘寇猶虞總戎有命用擇惟賢之佐式弘建親之  
典必能緝寧邦國叶贊天人誓餘丹浦之師勦彼綠林  
之盜載申朝獎爰藉舊勳宜副出車之命仍踐分麾之  
寵仍與天下兵馬元帥趙王係為副知節度行營事

來瑱為潁川郡太守乾元中史思明又陷東京詔瑱為  
陝州刺史充陝虢節度使鎮陝州俾遏東寇無何襄州  
鎮兵擾亂轉瑱為襄州刺史充山南東道節度觀察等

使

代宗寶應元年七月辛卯詔曰工部尚書兼御史大夫  
隴右節度觀察等使大寧郡王僕固懷恩經武大才濟  
時良具今以寇窘河雒思用討除宜輟務於西陲俾廓  
清於東夏可充朔方行營節度使本官封如故時將收  
河雒以懷恩宿將勇而有謀乃委以東討

廣德元年冬吐蕃寇京師乘輿幸陝州以右羽林大將  
軍衛伯玉有幹畧可當重寄乃拜荆南節度觀察等使

二年正月丁巳詔太子賓客薛景仙為南山五溪谷防禦使時蕃寇初潰兇徒盜聚山谷或至數百人晝伏夜動攻害閭里人不甚寧景仙素以勇猛知名及是行也老幼咸悅

德宗建中四年七月以神策大將軍尚可孤兼御史大夫充荆襄應援淮西使

興元元年四月帝在梁州臨軒備禮授副元帥渾瑊節鉞中書令宣制曰寇賊干紀授爾節鉞以戡多難往欽

哉瑛跪曰將相之重悉以寄臣誓當畢力以揚陛下之  
休拜受而退八月癸卯加神策軍京畿衛渭南渭北鄜  
坊節度及兵馬副元帥司徒兼中書令合川郡王食實  
封一千五百戶李晟兼鳳翔尹充隴右節度度支營田  
觀察使仍充管内諸軍及涇原四鎮北庭行營兵馬副  
元帥改封西平郡王加河東保寧軍節度觀察使太原  
尹北都留守檢校司徒平章事北平郡王馬燧奉城軍  
及晉慈隰節度並管内諸軍行營兵馬副元帥以靈鹽

豐夏節度使邠寧振武奉天永平等軍馬副元帥侍中  
兼靈州大都督樓煩郡王食實封一千八百戶渾瑊為  
河中尹河中絳州節度觀察等使仍充河中同絳陝虢  
節度及管內諸軍行營兵馬副元帥改封咸寧郡王

貞元初樊澤為襄陽節度使三年代張伯儀為荆南節  
度觀察等使江陵尹兼御史大夫三歲加檢校禮部尚  
書會襄州節度曹王臯卒於鎮軍中剽掠擾亂以澤威  
惠素著於襄漢復代曹王臯為襄州刺史山南東道節

度使

劉昌初為宣武軍節度使劉玄佐佐兵馬使貞元三年玄  
佐朝京師帝因以宣武士衆八千人委昌北出五原軍  
中有退却沮事者昌繼斬三百人遂行尋以本官授京  
西行營節度使歲餘授涇州刺史充四鎮北庭行營兼  
涇原節度度支營田等使

李自良為河東軍都將德宗欲以自良代馬燧為節度  
使自良以事燧久不欲代為軍帥帝以河東密邇突厥



難於擇帥翌日自良謝帝謂之曰卿於馬燧存軍中事  
分誠為得體然北門之寄無易於卿即日拜檢校工部  
尚書兼御史大夫太原尹北都留守河東節度度支營  
田觀察等使

十一年河東節度李自良卒以行軍司馬兼太原少尹  
御史大夫李說知府事為河東節度度支營田觀察留  
後北都副留守初自良得疾凡六日卒匿喪至明日乃  
揚言病丙戌乃告喪先是都虞候張瑤久在軍素得衆

心嘗請告還葬自良未許至是李說與監軍王定遠謀  
乃給瑤假以大將毛朝陽代瑤戊子遣以聞先是中使  
第五國珍奉使靈朔迴至太原遇自良病困遲留比知  
自良死乃馳赴京師先李說使至帝因命國珍齋授誥  
命往太原兼勅書三十餘封賜其大將及管內刺史焉  
十五年蔡州吳少誠悖逆詔宣武等十節度討之十二  
月王師大潰於小澗河時軍旣烏合且無統帥諸營兵  
馬無多少各有監軍數十人專掌兵制進退討襲互相


規利故未甚與賊交鋒而自潰。車與戈甲資糧屢屨竝為賊所有。繇是議招討使之選。

十六年二月，以左神策軍行營鹽夏綏銀州節度觀察押蕃落使韓全義為蔡州行營招討處置使，應北路行營諸軍將士。竝取全義指麾陳許節度度支營田觀察使上官悅充副使。

李景畧貞元中為河東節度行營司馬，歲餘風言回紇將南下陰山，豐州宜得其人。帝素知景畧居邊練事，時

方軫慮中官竇文場在旁復言景畧堪任於是以景畧為豐州刺史天德軍西受降城都防禦使

高固建中末為邠寧節度渾瑊裨將李懷光既叛使留後張昕取將士萬餘人以資援河中固時在軍中斬昕以狗授前軍兵馬使貞元十七年節度使揚朝晟卒軍中請固為帥德宗念固前功因而授之累官至檢校右僕射



冊府元龜卷一百十九

欽定四庫全書

子部

冊府元龜卷一百二十一

詳校官中書臣涂日煥

員外郎臣牛稔文覆勘

總校官庶吉士臣何思鈞

校對官中書臣王璵

謄錄監生臣黃奕選

欽定四庫全書

冊府元龜卷一百二十

宋 王欽若等 撰

帝王部

選將第二

唐憲宗初高崇文為長武城使永貞元年冬劉闢阻兵  
朝議討伐宰臣杜黃裳以為獨任崇文可以成功元和  
元年春拜檢校工部尚書兼御史大夫充右神策行營  
節度使兼統左右神策奉天麟遊諸鎮兵以討闢時宿

將專征者甚衆人人自謂當選及詔出大驚崇文在長武練卒五千常若寇至及是中使至長武叩時宣命而辰時出師五千器用無闕者

元和二年四月甲子以尚書右僕射伊慎代范希朝為右金吾衛大將軍以希朝代李樂為靈州長史充朔方靈鹽節度仍進位檢校司空以右神策鹽州定遠三鎮兵馬隸焉所以革近制任邊將也

四年十月鎮州王承宗拒命詔左神策護軍中尉吐突承璀



討之以左武衛將軍王萬敵為左神策軍行營先鋒兵馬使仍復本姓趙氏萬敵本成德軍裨將也以善戰為王武俊所重令姓王氏士真時遣歸朝習知鎮冀事故授以前鋒

九年八月辛酉以河陽節度使烏重胤為檢校工部尚書兼汝州刺史充河陽三城懷汝等州節度觀察處置營田等使討淮西故移重胤壓境焉

十一月甲午以御史中丞胡証充振武麟勝節度使時

振武累用節將邊事曠廢朝廷思用儒者以撫安之乃  
有是命

十一年七月以荆南節度使袁滋為彰義軍節度使以  
徐州刺史楊旻為唐州刺史兼御史中丞充行營都知  
兵馬使以滋儒者故須復以旻將其兵

渾鎬歷延唐鄧州刺史及討王承宗屬義武軍節度任  
迪簡疾不能軍帝以鎬藉父名足以鎮之乃令代迪簡  
為帥鎬始至整練其衆甚有威名

十三年五月以左僕射山南東道節度使李愬為鳳翔節度使路繇闕下會李師道再叛詔徵兵討之遂改愬為徐泗節度使及青齊平將有事燕趙又命愬以特進檢校尚書右僕射同中書門下平章事為昭義軍節度使抵四月遷魏博等州節度使

穆宗長慶元年八月制曰父子之讐不同天雖下至匹士而猶寢苫枕戈以期必報是以子胥不狗伍奢之死卒能發荆王之墓鞭不義之屍取貴春秋垂名萬古而

况於身備將壇父死人手家譽國恥併在一門當懷嘗  
膽之心豈俟絕漿之禮金革無避其在茲乎前涇原節  
度觀察處置使檢校左散騎常侍兼涇州刺史御史大  
夫田布咨爾先臣惟國元老首自河朔來朝帝庭而又  
東取青齊北討深趙提挈義旅勤勞王家冒白刃而不  
疑推赤心以自信屬冀方求帥予所重難輟自大名付  
茲巨鎮而中台暗折上將妖侵蝨賊潛寘於心腹豺狼  
勃興於肘腋人神憤痛朝野驚嗟深軫予懷誓擒元惡

以布詩書竝習忠孝兩全常用魏師克征淮孽素行恩  
信共著勳庸豈無奮激之徒為報寇讐之黨且魏之諸  
將繇爾父而崇高魏之三軍蒙爾父之仁愛昔既同其  
美利今豈念其深冤爾其淬礪勇夫敬恭義士一飯之  
飽亦同於卒伍一毫之費必用於戈矛非筭畫勿萌於  
心非軍旅勿言於口居則席藁寒則抱冰以喪禮處之  
若哀心感者必有為橫一刎頸感智捐軀下報營魂旁清  
醜類於虜至誠何託稔惡難逃矧彼兇殘去將安往墨

續在體玄森在前題劍執金無忘哀敬可起復寧遠將軍守右金吾衛大將軍員外置同正員檢校工部尚書兼魏州大都督府長史充魏博等州節度觀察處置等使

十月甲子以河東節度使裴度兼充鎮西四面行營都招討使以左領軍衛大將軍杜叔良為開府儀同三司檢校工部尚書兼御史大夫充深州諸道行營節度使戊辰以深冀等州節度觀察使牛元翼為檢校工部尚書

兼鎮州大都督長史御史大夫充成德軍節度鎮深冀  
趙等州觀察等使時王廷湊賊殺田弘正竊據土地朝  
廷以元翼鎮冀舊將素以善戰聞班位勇畧在廷湊之  
右故前命為深冀節度使及是又以成德令付之希鎮州  
兵士望風稟令不戰而歸也丙戌以深州行營節度使  
杜叔良為滄州刺史充橫海軍節度滄德棣等州觀察  
處置等使依前檢校工部尚書兼御史大夫以代烏重  
脣以重脣檢校司徒兼興元尹兼御史大夫充山南西

道節度使重胤老于征行以賊憑凌未可輕進觀望累月帝意急於誅討以叔良赴深州行營面辭日指期朝夕殄寇故有此拜

十二月戊寅以鳳翔節度使李光顏為許州刺史充忠武軍陳許蔡等州觀察處置等使以代李遜仍兼深州節度使統諸軍以李遜為鳳翔隴州節度觀察處置等使朝廷以光顏盡忠常為陳許節度使頗得士心將討鎮冀遂有此拜以遜文吏故換鎮以便其事陳州刺史



兼御史中丞王沛空委光顏量才任用沛比為光顏麾下都將部署有方畧淮蔡平授陳州刺史以光顏方務征討故委以軍任

李聽為羽林軍有名馬穆宗在東宮令近侍諷聽獻之聽以職摠軍不敢從令帝不悅及即位之始幽冀不庭太原與二鎮接境方議易帥宰臣進擬帝皆不允謂宰臣曰李聽為羽林將軍不與朕馬是必可任遂擢授檢校兵部尚書太原節度觀察使兼太原尹充北都留守

文宗太和元年四月庚申以太僕卿高瑀為檢校左散  
騎常侍充忠武軍節度觀察處置等使初瑀既以疾亟  
聞議者多謂忠武之師必自謀帥或曰禁軍諸將得之  
羣口囂囂以節制之選不繇執政既而裴度韋處厚等  
密議以瑀常刺陳蔡二州政皆可取且熟忠武軍情莫  
如瑀者會陳許表至果以瑀為請及啓事於延英即以

瑀名聞而拜焉

節度之權自大歷以來或以邪門而致  
近歲則財鑑公行畧無避忌貪邪之輩

汲汲焉日有窺伺枉道輸貨動逾億千皆以倍稱之約  
假于富族及至鎮則罄公帑以酬之然後脂血疲人補

其所缺天下節度觀察之使錄是而率十六七故高瑀之拜縉紳忤賀者彌月為宰臣戲相謂曰自今以後作

債節度使

當少矣

烏重胤太和初以檢校司徒為天平軍節度鄆曹濮等州觀察處置等使時李同捷私據境土謀襲父位議者以為別命節制慮孽童拒違又朝廷方務安人遂命同捷移鎮兗海以重胤羣帥中齒輩舊老加太子太師平章事俾兼統滄景仍舊割齊州附之蓋望不勞師而底定也數月而卒贈太尉

三年冬南蠻入寇西川節度使杜元穎以失政貶黜特  
詔東川節度郭釗兼領西川以紓其亂兵至成都府賊  
蠻奔遁遂以釗檢校司空充劍南西川節度使

四年二月興元軍作亂節度使李絳被害假內追朝  
詔曰漢水上游梁山東險控巴岷之道路作咸鎬之藩  
屏實命長帥必惟全才簡求臣僚僉屬邦彥是用築齋  
壇以賜鈇鉞登廉車以察風俗一方之事悉以咨之中  
大夫守尚書右丞上護軍祁縣開國子食邑五百戶賜

紫金魚袋溫造風度端雅質量閎厚立朝正色直道當  
官自登周行藹有休稱前在憲府爰持國綱人所未能  
心已獨至聽言盡主於忠信指事必根於理化豈彼常  
意自謂知人洎南宮提領右轄郎曹承式體要弘通屬  
聞漢中撫事多故非寬仁不可以理軍旅非廉實不可  
以緝編氓擇任之時誠異他日繇是命爾尹正褒國節  
制梁川首列侍從之臣秩遷御史之率至若革故弊以  
存遠畧因其事以定衆心姑務載安勿使告病弛張威

惠在爾能之勗哉惟勤無忝我推轂之命可檢校散騎  
常侍兼興元尹御史大夫充山南西道節度管内觀察  
處置等使宣制畢宰相及造并興元宣慰使崔瑄同赴  
對於延英造素有威望及是拜中外莫不瞻矚帝前席  
與語凡數十百言且趣令赴鎮

七年正月甲寅以新授鎮南節度使崔珙為武寧軍節  
度徐泗觀察等使以右金吾將軍王茂元為嶺南節度  
觀察經畧等使珙常為泗州刺史深練兵事頗得士心

前除廣州申謝於延英陳奏明辨稱旨時高瑀鎮徐州  
王智興之後兵驕不能制帝常軫慮遂命珙代焉

九年黨項寇邊以左諫議大夫胡証有安邊才畧乃授  
單于都護御史大夫振武軍節度使前任將帥非統馭  
之才邊事曠廢朝廷故特用証以鎮之

僖宗乾符六年十月制以鎮海軍節度浙江江西道觀察  
處置等使高駢檢校司徒同平章事揚州大都督府長  
史充淮南節度副大使知節度事江淮鹽鐵轉運江西

行營招討等使進封燕國公初駢在浙西遣大將張麟  
梁纘等大破黃巢於浙東賊進寇福建踰嶺表故移鎮  
揚州時賊北踰大庾嶺朝廷授駢諸道行營兵馬都統  
中和元年黃巢寇京城七月乙卯車駕幸西蜀丁巳以  
侍中王鐸檢校太尉中書令兼滑州刺史義成軍節度  
鄭滑觀察處置兼統京城四面行營兵馬都統以太子  
太師崔安潛為副觀軍容使西門思恭為天下行營兵  
馬都監押中書侍郎平章事諸道鹽鐵轉運等使韋昭



度為供軍使時淮南節度使高駢為諸道行營都統自  
車駕出幸中使相繼促駢起軍駢託以周寶劉漢宏不  
利於已遷延半載竟不出軍乃以鐸為都統以河中節  
度使王重榮為京城北面都統義武軍節度使王處存  
為京城東面都統鄜延節度使李存章為京城西北面  
都統朔方軍節度使拓拔思恭為京城南面都統以忠  
武監軍使楊復光為天下行營兵馬都監代西門思恭  
許王鐸以便空從事遣郎官御史分行天下徵兵赴闕

後唐莊宗初為晉王天祐二十年二月契丹寇漁陽上  
擇帥北征郭崇韜以汴寇未平李繼韜背命北邊虛弱  
非大將無以鎮臨請命李存審為燕帥捍之時存審方  
臥病私第羸瘠殆甚帝遣使諭之因奏臣効忠稟命靡  
敢為辭但病恙纏綿未堪祇役既而以存審檢校太傅  
兼侍中充幽州盧龍節度管内觀察處置押奚契丹兩  
蕃經畧盧龍軍等使勉而赴任

同光二年三月幽州李存審疾篤求入覲議擇帥代之

方內宴帝曰吾披榛故人零落殆盡所餘者存審耳今復寒疾北門之事知付何人因目右武衛上將軍李存賢曰無易於卿即日授特進檢校太保充幽州盧龍節度行軍司馬旬日以李存審為汴州節度以存賢代存審為幽州盧龍節度使

三年秋客省使李嚴使西州迴言王衍可圖之狀莊宗與郭崇韜議討伐之謀方擇大將時明宗為諸道兵馬總管當行崇韜自以官相傾欲立大功以制之乃奏曰

契丹犯邊北面須藉大臣全倚摠管鎮禦臣伏念興聖  
宮使繼岌德望日隆大功未著空依故事以親王為元  
帥付以討伐之權俾成其威望莊宗方授繼岌即曰小  
兒幼稚安能獨行卿當擇其副崇韜未答帝曰無踰於  
卿者乃以繼岌為都統崇韜為招討使

明宗天成三年荆南高季興叛九月己亥詔武寧軍節  
度使房知溫兼荆南行營招討使知荆南行府事以尚  
食使馬從斌守澤州刺史中外分命百道赴軍襄陽

十月定州王都反以齊州防禦使孫璋充北面行營馬步都虞候丙午制橫海軍節度觀察等使檢校司徒李從敏兼北面行營副招討使

是月丁酉朔方軍大將已下差人齎絹表到京請朝廷命帥以安藩閩戊戌以前襄州守禦并本州城兵馬都監磁州刺史康福為檢校司空靈州大都督府長史行梁州刺史充朔方河西等軍節度靈威雄武涼州等觀察處置管內營田押蕃落度支溫乚摧稅等使

西方鄴弱冠歸梁得侍左右忿無權位歸莊宗於河上  
以為奉義指揮使每從征伐咸以身先天成初荆渚違  
命上據三峽明宗素知其才擢授夔州刺史充東南面  
行營招討副使鄴將偏師收復二州畫圖上進

長興三年十月戊午帝御廣壽殿謂范延光秦王從瑩  
等曰契丹欲謀犯塞邊上空得嚴重帥臣卿等商量誰  
為可者以聞甲戌秦王從瑩奏伏見北面奏報契丹族  
帳近塞吐渾突厥已侵邊地北面戍卒雖多未有統率

早空命大將帝曰卿等商量定未具奏曰將校之中康義誠可帝曰召義誠來遂令宣徽使朱弘昭往知襄州

事代義誠還京師

臣欽若等曰時晉高祖首預其選事具帝王創業門

末帝清泰二年以安元信為大同軍節度使元信初從莊宗定魏博元城之戰克捷居多移為博州刺史與梁軍對壘德勝渡元信為右廂排陣使王處直引契丹背盟北邊做擾以元信父在邊故有是命

晉少帝開運元年八月制曰宣王講武遂獫狁於太原

漢帝出師走匈奴於瀚海是知蠻夷猾夏不能絕之於  
古今戎狄無厭不能拘之以信義先皇帝昔當草昧方  
在龍潛未登鄙邑之壇始有晉陽之難契丹主徑驅蕃  
部直抵并郊遂解重圍助成大統我之興也彼有力焉  
於是邀之以鬼神申之以盟誓載諸簡冊傳厥子孫爾  
後常念前因每思厚報減宮闈之服玩罄府藏之珠珍  
供億無時道途相望而契丹貪殘滋甚驕縱異常通使  
命於江淮徵貢輸於郡國苞藏既久姦譎漸萌既而與



議誼譁羣情憤激軍民扼腕中外同辭請興貔虎之師  
以遏豺狼之患先皇帝重其信誓篤以初終降萬乘之  
尊禮不義之虜耗中原之力奉無已之求迫于纘受丕  
圖虔承顧命每欲息民繼好敢忘屈已從人所以厚禮  
卑辭以隆其意推心置腹以示其誠其如鴆毒潛深獸  
心難革乘我歉歲伐予大喪平視中原竊窺神器朕實  
不德民罹其殃愧悼增深寤寐興嘆向者躬提黃鉞親  
指靈旗駐於甘泉自春徂夏賴祖宗垂慶天地儲休猛

將如雲謀臣若雨士百其勇人一其心寸鏃不遺狂戎  
自潰氛霾少息師旅凱旋今則漸入秋深慮為邊患朕  
以志平寇難不敢荒寧將期親率全師恭行天討庶幾  
一舉永靜三邊罔辭櫛沐之勞用拯生靈之患得不精  
求將帥慎柬偏裨冀成破竹之功以殄折膠之寇爰於  
剛日乃降命書順國軍節度鎮深趙等州觀察處置幽  
州道行營副招討等使特進檢校太師兼中書令行真  
定尹駙馬都尉杜重威地居戚里神授戎韜久服金革

之勞累濟艱難之運虎牢晝閉一麾而發賊自消河朔  
未寧再駕而氛妖繼息戡定之業溢於鼎鐘大平軍節  
度鄆齊棣等州觀察處置兼管內河堤等使光祿大夫  
檢校太尉平章事張從思清明可鑑忠正無邪風懷刺  
虎之謀早列濯龍之籍當襄陽之役克成監護之勳及  
北虜之來實賴藩籬之固器業之用可謂縱橫西京留  
守起復檢校太尉兼侍中行河南尹景延廣文武全才  
雲龍際會指經綸於掌內藏甲馬於胷中久權七萃之

師繼委十連之帥軍民畏伏畿甸肅清左右之勞書於  
盟府武寧軍節度徐宿等州觀察處置等使開府儀同  
三司檢校太師兼侍中趙在禮河嶽鍾靈松筠植性授  
玉鈐之祕畧得金版之沈機輔翼數朝周旋重鎮述職  
而必先九牧事君而唯盡一心尊獎之功光乎史冊建  
雄軍節度晉慈隰等州觀察處置等使特進檢校太師  
平章事安叔千衆推武庫素曉陣圖疾惡如讎見義思  
勇觴酒豆肉無虧撫士之心尺籍伍符盡得摠戎之訣

軍旅之任實契僉諧前泰寧軍節度充沂密等州觀察  
處置等使特進檢校太師平章事安審信父處腹心早  
攀鱗翼個儻乃萬夫之長驍雄真六郡之豪鷲領虎頭  
咸仰將軍之相牙璋犀節累持方伯之權英特之名播  
於中外河中護國將軍節度管内觀察處置等使開府  
儀同三司檢校太師平章事安審琦嚴明無鬚寬簡自  
居善知奇正之謀備熟孤虛之法首赴風雲之會昔同  
帶礪之盟累殿藩垣常堅夾輔連帥之重倚若長城河

陽三城節度孟懷等州觀察處置管内河堤等使青州  
行營副都部署特進檢校太師符彥卿惟爾先臣實為  
名將世襲弓裘之慶門傳忠孝之規西漢三雄徒稱傑  
出東京七校乃為時生竭盡之心貫于金石義成軍節  
度滑漢等州觀察處置管内河堤等使北面行營馬步  
都虞候開府儀同三司檢校太師皇甫遇劍敵萬人力  
摧九虎赤羽若日蒲大夫之英風快馬如龍曹景宗之  
意氣繼承重寄必竭純誠義烈之稱播於寰海北而行

營馬部都排陣使兼馬軍都指揮使特進檢校太保右  
神武統軍張彥澤猛若關張氣吞荆聶荐膺委寄每著  
勤勞鳴鏑離絃既得吟猿之妙青萍出匣久彰斷兕之  
名營陣之間皆推果毅橫海軍節度滄景德等州觀察  
處置管内河堤等使幽州道行營右廂排陣使特進檢  
校太師王廷裔鬼谷傳書神龜授印委鎮臨於滄海賴  
控扼於邊陲繕甲治兵暗蓄摧兕之計深溝高壘不移  
持重之心捍禦之謀斷於匈臆保義軍節度陝虢等州

觀察處置等使特進檢校太尉宋彥筠威惠兼著膽氣  
無儔累佐戎權善貞師律千軍萬馬憚陳慶之雄名三  
令五申得孫武之戰術將帥之選皆謂當仁前懷德軍  
節度管内觀察處置等使光祿大夫檢校太傅田武早  
從戎伍備歷艱難安邊展頗牧之才制勝合韓吳之法  
向者仗其舊德委以邊藩頗資外禦之功實有分憂之  
績忠貞之節雅叶東求北面行營步軍都排陣使兼步  
軍都指揮使特進檢校太保左神武統軍潘環幕府書



勳師干著效攻城野戰獨麾鄭國之旗陷陣先登幾獲  
魚門之胄洎外環衛彌見公忠其革之時所宜登用而  
皆位崇侯伯任重茅土俱為社稷之臣悉是棟梁之具  
或推忠殉義或報國忘家常堅翼戴之心夙蘊澄清之  
志朕所以告於宗廟質以著龜授之以征輦付之以蕭  
鐵但以狂戎侵掠生聚虔劉既貽中國之羞抑亦人臣  
之恥爾等上則受先皇顧託輔予冲人次則副朝廷倚  
毘委之重任所宜同德比義戮力齊心各竭乃誠共安

國步功業可以不朽富貴可以無窮況今芻粟俱充士卒咸憤旌旗萬隊甲馬千羣呼吸則山嶽蕩搖號令則乾坤震動以此制敵何敵不摧以此攻城何城不克竚期獻俘清廟懸首素旗同集大功永清四海於戲周王任吉甫南仲乃懼戎夷漢帝任去病衛青遂空沙漠今吾命帥皆謂得人勉立異勳速平多難無令數子獨擅前功凡我股肱當體朕意杜重威充都招討使張從思充兵馬都監景延廣充馬步軍都排陣使趙在禮充馬

步軍都虞候安叔充馬步軍左排陣使安審信充馬

步軍右排陣使安審琦充馬步軍都指揮使符彥卿充

馬軍左都指揮使皇甫遇充馬軍右都指揮使張彥澤

充馬軍排陣使王廷裔充步軍左都指揮使宋彥筠充

步軍右都指揮使田武充步軍左廂排陣使潘環充步

軍右廂排陣使

臣欽若曰時漢高祖為太原留守授北面行營都統具帝王創業門

天福九年契丹入侵命宋州節度使高行周為北面行

營都部署河陽節度使符彥卿為騎軍右排陣使宿州

刺史梁進明副之神武統軍皇甫遇為騎軍右排陣使  
懷州刺史薛懷讓副之陝府節度使王周為步軍左排  
陣使沁州刺史劉詞副之羽林統軍潘環為步軍右排  
陣使麟州刺史尹實副之護聖右廂主王景王萬敢為  
騎軍左右將慈州刺史周景殷武衛將軍張鵬監護奉  
國左右廂主李殷程福贊為步軍左右將閣門使蕭處  
仁高勳監護前絳州刺史劉在明為先鋒都指揮使衛  
州刺史石公霸副之坊州刺史陳思讓監護又以前單

州刺史劉喜為都壕寨使前階州刺史姚武為都橋道使

周高祖廣順二年正月以侍衛步軍都指揮使曹英為  
兗州行營都部署齊州防禦使史延韜為副部署以皇  
城使向訓為兵馬都監陳州防禦使樂元福為馬步軍  
都虞候率兵討慕容彥超

世宗顯德元年三月以天雄軍節度使衛王符彥卿為  
河東行營都部署知太原行府事澶州節度使郭崇為

行營副都部署宣徽南院使向訓為行營兵馬都監侍  
衛都虞候李重進為行營都虞候華州節度使史彥超  
為先鋒都指揮使領步騎二萬進討河東詔河中節度  
使王彥超陝府節度使韓通率兵自陰地關討賊以河  
陽節度使劉詞為隨駕都部署以鄜州節度使白重贊  
為隨駕副部署二年六月以曹州節度使韓通充西南  
面行營都虞候

七月以鳳翔節度使王景兼西南面行營都招討使以

宣徽南院使鎮安軍節度使向訓兼西南面行營都監  
以討秦鳳

十一月以宰臣李穀為淮南道行營都部署知廬壽州  
行府事以許州節度使王彥超為行營副部署命侍衛  
馬軍都指揮使韓令坤等一十二將各帶行征之號以  
從焉

三年正月帝親征淮南甲寅次正陽命侍衛馬步軍都  
指揮使李重進為淮南道行營都招討使仍以襲衣金

帶玉鞍名馬等賜之

冊府元龜卷一百二十



欽定四庫全書

冊府元龜卷一百二十一 宋 王欽若等 撰

帝王部

征討

夫兵之設也所以威不軌而昭文德故周官有九伐之制大易載師貞之象其所繇來舊矣蓋天下有道政繇上出奉辭伐罪宣威靖亂所以詰誅暴慢奮揚武怒綏厥兆民納於軌物者也自帝軒之世戎功震疊二帝三

代而下曷嘗不赫怒濯征以靖亂畧侮亡固存以修人紀至於保姦蒐慝變常悖理負固安忍興戎犯順以覬覦非望者未有不勦滅覆亡為世大戮焉

黃帝既代神農氏為天子天下有不順者黃帝從而征之平者去之

事具帝王親征門

帝嚳時共工氏作亂帝使火正祝融討之不盡乃以庚寅月誅祝融更命其弟吳回代兄居火正為祝融滅共

工氏

觸不周山而死

帝舜時苗民逆命帝曰咨禹惟時有苗弗率汝徂征苗

之民數干王誅率徂徃也禹乃會羣后誓于師曰濟

濟有衆咸聽朕命會諸侯共伐有苗軍旅蠢茲有苗昏

迷不恭蠢動昏暗也言其所以宜討之侮慢自賢反道敗德狎侮先王輕慢典教

反正道君子在野小人在位廢仁賢任奸佞民棄不保天降之

咎言民叛天災之肆予以爾衆士奉辭罰罪肆故也辭謂不恭罪謂侮慢以下事

爾尚一乃心力其克有勳尚庶幾一汝心力以從我命三旬苗民逆

命旬十日也以師臨之一月不服責舜不先有文誥之命威讓之辭而便憚之以威脅之以兵所以生亂

益贊于禹曰惟德動天無遠弗届

贊佐届至也益以此義佐禹欲修其德致

遠滿招損謙受益時乃天道

自滿者人損之自謙者人益之是天之常道

帝

初耕於歷山往于田日號泣于旻天于父母

仁覆慈下謂之旻天

言舜初耕于歷山時為父母所疾日號泣于旻天及父母克已自責不責于人

負罪引慝祇載

見瞽瞍夔夔齊慄瞽瞍亦允若

慝惡載事也夔夔慄懼之貌言舜負罪引慝以

事見于父慄懼齊莊父亦信順之言能以至誠感頑父

禹拜昌言曰兪班師振旅

昌當也以益言為當拜受而然之遂還師兵入曰振旅言整衆

帝乃誕敷文德

遠人不服大布

文德以來之

舞干羽于兩階

干楛羽翳也皆舞者所執修闡文教舞文舞于賓主階間抑武

事  
七旬有苗格

討而不服不討自來御之者有道也三苗之國左洞庭右彭蠡在荒服之例去

京二千五百里

夏仲康即位羲和誨淫廢時亂日

羲氏和氏世掌天地四時之官自唐虞至

三代世職不絕承太康之後沉酒於酒過差非度廢天時亂甲乙

往征之作脣征

脣國之君

受王命往征之

殷高宗時楚人叛出兵伐之

周成王少周公攝行政當國管叔蔡叔羣弟疑周公與

武庚作亂畔周周公奉成王命伐誅武庚管叔放蔡叔

三年而畢

幽王之時荆舒不至乃命將率東征役久病於外

荆謂楚也

舒舒鳩舒鄧舒庸之屬役謂士卒也故作漸漸之石詩

宣王命大師皇父整六師以程伯休父為大司馬克定

淮浦之國進而伐徐徐方來庭故召武公作常武之詩

以美之

常武以其有常德而立武功也

漢高祖五年既滅項羽羽所立臨江王共敖前死子尉

嗣立為王不降遣盧綰劉賈擊虜尉

十二年十二月陳豨降將言豨反時燕王盧綰使人之

豨所陰謀

之往也

帝使辟陽侯審食其迎綰綰稱疾食其

言綰有反端三月使樊噲周勃將兵擊綰詔曰燕王綰與吾有故愛之如子聞與陳豨有謀吾以為亡有故使人迎綰綰稱疾不來謀反明矣燕吏民非有罪也賜其吏六百石以上爵各一級與綰居去來歸者赦之

景帝三年正月吳王濞膠西王卬楚王戊趙王遂濟南王辟光菑川王賢膠東王雄渠皆舉兵反遣太尉周亞

夫大將軍竇嬰將兵擊之斬御史大夫晁錯以謝七國  
二月壬子諸將破七國斬首十餘萬級追斬吳王濞於  
丹徒膠西王卬楚王戊趙王遂濟南王辟光菑川王賢  
膠東王雄渠皆自殺

後漢光武建武元年六月即位于鄗七月遣耿弇率彊

弩將軍陳俊軍伍杜津

在鞏縣北一名士杜津有渚名  
鮪者武王伐紂至於鮪水是也

備滎陽以東使吳漢率朱祐及廷尉岑彭執金吾賈復  
揚化將軍堅鐔等十一將軍圍朱鮪於雒陽九月辛卯



鮪舉城降

二年正月遣大司馬吳漢率九將軍擊檀鄉賊於鄴東

大破降之是月真定王楊臨邑侯讓謀反

楊景帝七代孫

遣前

將軍耿純誅之二月遣驃騎大將軍景丹率征虜將軍

祭遵等二將軍擊弘農賊破之因遣祭遵圍蠻中賊張

滿

三月遣執金吾賈復率二將軍擊更始郾王尹遵破降

之又遣虎牙大將軍蓋延率四將軍伐劉永

四月大司馬吳漢拔胸獲董憲龐萌山東悉平

五月遣虎牙大將軍蓋延等七將軍從隴道伐公孫述  
初隗囂為西州大將軍會公孫述遣兵寇南郡乃詔囂  
當從天水伐蜀因此欲以潰其心腸囂復上言曰天水  
險阻棧閣絕敗又多設支關帝知其終不為用叵欲討  
之遂西幸長安至是遣耿弇等伐蜀先使來歙奉璽書  
喻旨囂疑懼即勒兵使王元據隴坻伐木塞道謀欲殺  
歙歙得亡歸諸將與囂戰大敗各引退囂因使王元行

巡侵三輔征西大將軍馮異征虜將軍祭遵等擊破之  
先是樂浪郡人王閎為郡三老更始敗土人王調殺郡  
守劉憲自稱大將軍樂浪太守是歲帝遣太守王遵將  
兵擊之至遼東閎與郡曹吏楊邑等共殺調迎遵皆封  
為列侯

七年八月隗囂寇安定征西大將軍馮異征虜將軍祭  
遵擊却之

九年六月遣大司馬吳漢率四將軍擊盧芳將賈覽於

高柳八月遣中郎將來歙監征西大將軍馮異等五將  
軍討隗純於天水

十一年十二月大司馬吳漢率舟師伐公孫述

十二年十一月吳漢臧宮與公孫述戰於成都大破之  
述被創夜死漢屠成都夷述宗族及延岑等

十七年七月妖巫李廣等羣起據皖城

縣名屬廬江郡  
故城在今舒州

有皖水

遣虎賁中郎將馬援驃騎將軍段志討之九月破

皖斬李廣等

十八年二月蜀郡守將史歆叛遣大司馬吳漢率二將軍討之圍成都百餘日城破誅歆等

四月遣伏波將軍馬援率樓船將軍段志等擊交趾賊

徵側等

徵側及妹徵貳交趾女子甚雄勇太守蘇定以法繩之故反起十六年二月至是遣將討之

發長沙桂陽零陵蒼梧兵萬餘人討之

十九年正月妖巫單臣傅鎮等反據原武遣大中大夫臧宮圍之四月拔原武斬臣鎮等是月馬援破交趾斬徵側徵貳等餘皆降散進擊九真賊都陽等破降之徙

其渠帥三百餘口於零陵於是嶺表悉平

安帝永初三年九月海賊張伯路等寇畧緣海九郡遣侍御史龐雄督州郡兵討之

四年正月海賊張伯路復與勃海平原劇賊劉文河周文光等攻厭次殺縣令遣御史中丞王宗督青州刺史法雄討破之

五年九月漢陽人杜琦王信叛

琦自稱安漢將軍

遣侍御史唐

喜討破斬之

傳信首詣雄陽  
梟斬城門外

順帝建康元年八月揚徐盜賊范容周生等寇掠城邑遣御史中丞馮緄督州郡兵討之

桓帝永壽二年三月太山賊公孫舉等寇青兗徐三州遣中郎將段紀明討破斬之

延熹三年九月太山瑯琊賊勞丙等復叛寇掠百姓遣御史中丞趙某史闕其名持節督州郡兵討之

十一月太山賊叔孫無忌攻殺都尉侯章遣中郎將宗賢討破之

靈帝中平元年二月鉅鹿人張角自稱黃天其部帥三

十六萬皆著黃巾同日反叛安平甘陵人各執其王以

應之

安平王續  
江陵王忠

以河南尹何進為大將軍將兵屯都亭

置八關都尉官

都亭在雒陽八關謂函谷廣城伊關大谷還轅施門小平津孟津也

遣北

中郎將盧植討張角左中郎將皇甫嵩右中郎將朱雋

討潁州黃巾

四年二月滎陽賊殺中牟令

令落皓主簿滿業  
臨車不顧皆被害

遣河南

尹何苗討破之



五年九月遣中郎將孟益率騎都尉公孫瓚討漁陽賊

張純等瓚與純戰於石門大破之

時烏桓反叛與賊張純等攻斬中故瓚追

擊之石門山名也

在今營州西南

獻帝建安二年詔曰故左將軍袁術不顧朝恩坐創凶

逆造合虛偽欲因兵亂詭詐百姓始聞其言以為不然

定得使持節為平東將軍領徐州牧溫侯布

布呂布也

上術

所造惑眾妖妄知術鴟梟之性遂其無道修治王宮署

置公卿郊天祀地殘民害物為禍深酷布前後上策

孫策

也乃心本朝欲還討術為國効節乞加顯異夫懸賞候功惟勤是與故便寵授承襲前邑重以大郡榮耀兼至是策輸力竭命之秋也其亟與布及行吳郡太守安東將軍陳瑀戮力一心同時赴討

十年八月馬超在漢陽復因羌胡為害氏王千萬叛應超屯興國遣護軍將軍夏侯淵討之

魏文帝黃初六年利成郡兵蔡芳等以郡叛殺太守徐質遣屯騎校尉任福步兵校尉段昭與青州刺史討平

之其見脅略及亡命者皆赦其罪

明帝以黃初七年五月即位八月吳將諸葛瑾張霸等  
寇襄陽遣武軍大將軍司馬懿討破之斬霸征東大將  
軍曹休又破其別將於尋陽

太和元年正月西平麴英反殺臨羌令西都長遣將軍  
郝昭鹿磐討殺之

十二月新城太守孟達反詔驃騎將軍司馬懿討之攻  
破新城斬達傳其首

二年正月蜀大將諸葛亮寇邊天水南安安定三郡吏民叛應亮遣大將軍曹真都督關右竝進兵右將軍張郃擊亮於街亭大破之亮敗走三郡平

四年七月詔大司馬曹真大將軍司馬懿伐蜀

景初二年正月詔太尉司馬懿帥衆討遼東圍公孫淵於襄平大破之傳淵首於京師海東諸郡平

齊王正始五年二月詔大將軍曹爽率衆征蜀四月爽引軍還

嘉平四年十一月詔征南大將軍王昶征東將軍胡遵  
鎮南將軍毋丘儉等征吳十二月不利而還

五年五月吳太傅諸葛恪圍合肥新城詔太尉司馬孚  
拒之七月恪退還

高貴鄉公正元二年正月鎮東將軍毋丘儉揚州刺史  
文欽反大將軍司馬師征之

八月蜀大將軍姜維寇狄道以長水校尉鄧艾行安西  
將軍與征西陳泰并力拒維復遣太尉司馬孚為後繼

九月維退還

陳留王景元四年五月詔曰蜀叢爾小國土狹民寡而姜維虐用其衆曾無廢志往歲破敗之後猶復耕種沓中刻剥衆羌勞役無已民不康命夫兼弱攻昧武之善經致人而不致於人兵家之上略蜀所恃賴惟維而已因其遠離巢窟用力為易今使征西將軍鄧艾督率諸軍趣甘松沓中以羅取維雍州刺史諸葛緒督軍越武都高樓首尾躡討若禽維便當東西竝進掃滅巴蜀也

又命征西將軍鍾會繇駱谷伐蜀時鄧艾諸葛緒各統  
諸軍三萬餘人會統十餘萬衆分從斜谷駱谷入

十一月劉

禪降

晉武帝咸寧五年十一月大舉伐吳遣鎮軍將軍瑯琊  
王佃出涂中安都將軍王渾出江西建威將軍王戎出  
武昌平西將軍胡奮出夏口鎮南大將軍杜預出江陵  
龍驤將軍王濬廣武將軍唐彬率巴蜀之卒浮江而下  
東西凡二十餘萬以太尉賈充為大都督行冠軍將軍

楊濟為副總統衆軍

太康元年正月王渾尅吳尋陽賴卿諸城獲吳武威將軍周興二月王濬唐彬等尅丹陽城又尅西陵殺西陵都督鎮軍將軍留憲征南將軍成璩西陵監鄭廣王濬又尅夷道樂鄉城殺夷道監陸晏水軍都督陸景杜預尅江陵斬吳江陵督伍延平南將軍胡奮尅江安於是諸軍竝進樂鄉荆門諸戍相次來降以濬為都督益梁二州諸軍事復下詔曰濬彬東下掃除巴丘與胡奮王



戎共平夏口武昌順流長驚直造秣陵與奮戎審量其  
宜杜預當鎮靜零桂懷輯衡陽大兵既過荊州南境固  
當傳檄而定預當分萬人給濬七千給彬夏口既平奮  
宜以七千人給濬武昌既平戎當以六千人增彬太尉  
充移屯項總督諸方濬破夏口武昌遂泛舟東下所至  
皆平王渾周俊與吳丞相張悌戰於板橋大敗之斬悌  
及其將孫震沈瑩傳首雒陽皓窮蹙詣降送璽綬於瑯

瑯王佃

三月孫皓降

惠帝永康末趙廞反于蜀假梁州刺史羅尚節為平西將軍益州刺史西戎校尉時李特亦起於蜀攻蜀殺趙廞又攻尚荊州刺史宗岱率建平太守孫阜救之次於江州尚乃使兵曹從事任銳偽降因出密宣告於外剋日俱擊遂大破之斬李特傳首雒陽

大安中張昌作亂寧朔將軍劉弘轉使持節南蠻校尉荊州刺史率前將軍趙讓等討昌自方城至宛新野所向皆平以弘為鎮南將軍都督荊州諸軍事弘遣南蠻

長史陶侃為大都護叅軍蒯常為義軍都護牙門將皮  
初為都戰帥進據襄陽張昌并軍圍宛敗趙讓軍引退  
屯梁侃初等累戰破昌前後斬首數萬人及到官昌懼  
而逃於下雋山弘遣軍討昌斬之其眾悉降荆土平

永興二年十月詔曰得豫州刺史劉喬檄稱潁川太守  
劉輿迫脅驃騎將軍馮距逆詔令造構凶逆擅劫郡縣  
合聚兵眾擅用荀晞為兗州斷截王命鎮南大將軍荆  
州刺史劉弘平南將軍彭城王釋等其各勒所統徑會

許昌與喬并力今遣右將軍張方為大都督統精卒十萬廷武將軍呂郎廣武將軍騫羆建威將軍刁默等為軍前鋒共會許昌除輿兄弟又使前車騎將軍石超北中郎將王闡討輿等

懷帝永嘉三年九月劉聰圍浚儀遣平北將軍曹武討之東海王越入保京城聰至西明門越禦之戰於宣揚門外大破之

五年三月戊午詔下東海王越罪狀告方鎮討之

元帝建武元年石勒將石季龍圍譙城平西將軍祖逖擊走之帝傳檄天下曰逆賊石勒肆雲河朔逋誅歷載遊魂縱逸復遣凶黨石季龍犬羊之衆越河南渡縱其鴆毒平西將軍祖逖帥衆討擊應時潰散今遣車騎將軍瑯琊王裒等九軍銳卒三萬水陸四道徑造賊塲受逖節度有能梟季龍首者賞絹三千疋金五十斤封縣侯食邑二千戶又賊黨能梟送季龍首者封賞亦同之太興二年四月太山太守徐龕以郡叛自號兗州刺史

寇濟岱七月寇東莞遣太子左衛率羊鑒行征虜將軍

統徐州刺史蔡豹討之

三年五月  
龕降

穆帝永和十一年四月姚襄帥衆寇外黃冠軍將軍龍

季大破之

十二年三月姚襄入於許昌以太尉桓溫為征討大都督以討之八月戰於伊水大敗之襄走平陽徙其餘衆三千餘家於江漢之間十月慕容恪攻段龕於廣固使北中郎將荀羨帥師次于瑯琊以救之

廢帝海西公太和四年四月大司馬桓溫帥衆伐慕容  
暐大破之

孝武帝太元八年八月苻堅帥衆渡淮遣征討都督謝  
石冠軍將軍謝玄輔國將軍謝琰西中郎將桓伊等距  
之十一月諸將及苻堅戰於淝水大破之俘斬數萬計  
九年正月車騎將軍桓冲部將郭寶伐苻堅新城魏興  
上庸三郡降之

安帝隆安三年十一月妖賊孫恩陷會稽內史王凝之

死之吳國內史桓謙臨海太守新蔡王崇義興太守魏  
隱竝委官遁吳興太守謝邈永嘉太守司馬逸皆遇害  
遣衛將軍謝琰輔國將軍劉牢之逆擊走之

元興元年正月以後將軍元顯為驃騎大將軍征討大  
都督鎮北將軍劉牢之為元顯先鋒前將軍譙王尚之

為後部以討桓玄

二月尚之戰死三月牢  
之叛降于玄元顯遇害

義熙八年十二月以西陵太守朱齡石為建威將軍並  
州刺史帥師伐蜀



後魏道武皇始二年二月平原徐超聚眾反於叛城詔將軍奚辱捕斬之

八月遣撫軍大將軍略陽公元遵襲中山芟其禾菜入郭而還

天興二年三月中山太守仇儒亡匿趙郡推羣盜趙淮為王號使持節征西大將軍冀青二州牧鉅鹿公仇儒為淮長聚黨扇惑詔中領軍長孫肥討平之

四月前清河太守傅世聚黨千餘家自號撫軍將軍遣

征虜將軍庾岳討破之

七月范陽人盧溥聚衆海濱稱使持節征北大將軍幽

州刺史攻掠郡縣殺幽州刺史封沓

三年正月破之  
生致溥京師

五年十一月遣左將軍莫題討上黨羣盜秦頗丁零翟  
都於壺關上黨太守捕頗斬之都走林慮

明元泰常七年九月詔假司空奚斤節都督前鋒諸軍  
事為晉兵大將軍行揚州刺史交趾侯周畿為宋兵將  
軍交州刺史安固子公孫表為吳兵將軍廣州刺史前

鋒伐宗

太武始光三年九月帝以赫連屈丐既死諸子相攻遣

司空奚斤率義兵將軍封禮雍州刺史延普襲蒲宗兵

將軍周畿率洛州刺史于栗磾襲陝城

十月帝西伐事具帝王親征門

文成大安四年十月宗將殷孝祖修兩城於清水東詔

鎮西將軍天水公封勅文等擊之十一月詔征西將軍

皮豹子等三將三萬騎助擊殷孝祖

五年正月大破之

獻文皇興元年二月宗東平太守申纂戍無鹽遏絕王

使詔征南大將軍慕容白曜督諸軍以討之

三月  
尅之

孝文延興四年九月以宗廢帝內相攻戰詔將軍元蘭  
五將三萬騎及假東陽王丕為後繼伐蜀漢

太和元年十月宗葭蘆戍主楊文度遣弟鼠襲陷仇池  
詔征西將軍廣川公皮歡喜鎮西將軍梁醜奴平西將  
軍楊靈琮等率眾四萬討之閏月軍到建安鼠棄城南  
走

四年八月以齊高帝立遣平南將軍郎大檀三將出胸

城將軍白吐頭二將出海西將軍元泰二將軍出連口

將軍封匹三將出角城鎮南將軍賀羅出下蔡又詔昌

黎王馮熙為西道都督與征南將軍賀羅自下蔡東出

鍾離以伐齊

五年二月南征諸將大破齊將俘獲三萬餘口

十月蘭陵民桓富殺其縣令與昌慮桓和比連太山羣

盜張和顏等聚黨保五固推司馬朗之為主詔淮陽王

尉元等討之

十一年五月詔南部尚書公孫文慶上谷張伏子率衆

南討舞陰山

十二年四月齊將陳顯達攻陷醴陽左僕射長樂王穆亮率騎一萬討之顯達遁走

十八年十二月以齊明帝立遣行征南將軍薛貞度督四將出征襄陽大將軍劉昶出義陽徐州刺史元衍出鍾離平南將軍劉藻出南鄭以伐齊

宣武正始三年正月秦州民王智等衆二千自號王公尋推秦州主簿呂苟兒為主年號建明詔右衛將軍元

麗等討之

七月苟兒平

四月梁將江州刺史王茂先寇荊州屯於河南詔平南將軍楊大眼討破之

六月詔尚書邢巒出討徐兗

臣欽若等曰時徐兗屬梁朝

七月詔發定冀瀛相并肆六州卒十萬以濟南軍

八月兗州平詔平南將軍安樂王詮督後發諸軍以赴

淮南

九月徐州平

永平元年八月冀州刺史京兆王愉據州反假尚書李

平鎮北將軍行冀州事以討之

九月冀州平

十月豫州城人白早生殺刺史司馬悅據城南叛梁遣齊苟仁等四將以助之詔尚書邢巒行豫州事督將軍

崔暹率騎討之

十二月斬白早生擒齊苟仁等

二年正月梁遣王神念寇南兗詔輔國將軍長孫稚假平南將軍為都督率統軍郗虬等五軍以討之是月涇州沙門劉慧注聚眾反詔華州刺史奚康生討之

四年正月汾州劉龍駒聚眾反詔諫議大夫薛和率眾



討之又命郢州龍驤府長史辛祥為別將與和討滅之  
延昌冀州初大乘賊起遣長樂太守李虔為別將與都  
督元遙討平之

三年十一月詔司馬高肇與大將軍平蜀大都督步駙  
十萬西伐益州刺史傅堅眼出巴北平南將軍羊祉出  
涪城安南將軍奚康生出緜竹撫軍將軍甄琛出劍閣  
孝明以延昌四年正月即位三月以梁高祖於浮山堰  
淮規為揚徐之害詔平南將軍楊大眼討之

九月梁將趙祖悅襲據硤石詔定州刺史崔亮假鎮南

將軍率諸將討之又詔冀州刺史蕭寶寅為鎮東將軍

決淮堰

明年九月淮堰破緣淮城戍十餘萬口漂入于海

熙平元年正月以吏部尚書李平為鎮東大將軍兼尚

書右僕射為行臺節度討硤石諸軍

二月尅硤石祖悅盡俘其衆

五月梁衡州刺史張齊寇益州復以傅堅眼為刺史以

討之

正光四年十二月梁遣將寇邊詔假征南將軍崔延伯

討之

五年六月秦州城人莫折大提據城反自稱秦王殺刺史李彥詔雍州刺史元志討之南秦城人孫掩張長命韓祖香據城反殺刺史崔遊以應大提詔吏部尚書元循義兼尚書僕射為西道行臺率諸將西討九月詔尚書左僕射齊王蕭寶寅為西道行臺大都督率征西將軍都督崔延伯又詔撫軍將軍北海王顥為都督竝率諸將西討是月梁遣將裴邃虞鴻襲據壽春外城刺史

長孫稚擊走之遂退屯黎漿詔河間王琛總衆援之梁  
又遣將寇淮陽詔秘書監安樂王鑒率衆討之

十月高平酋長胡琛反自號高平王遣其將宿勒明達  
寇幽夏北華三州詔都督北海王顥率諸將討之

十一月高平人共迎胡琛詔太傅京兆王繼為太師大  
將軍率諸將討之

孝昌元年正月徐州刺史元法僧據城反害行臺高諒  
自稱宋王年號天啓遣其子景仲歸於梁遣其將胡龍

牙成景雋元畧等率眾赴彭城詔秘書監安樂王鑒討之鑒為法僧所敗梁遣豫章王綜入守彭城詔鎮國將軍臨淮王彧尚書李憲為都督衛將軍國子祭酒安豐王延明為東道行臺儀同三司李崇為東道大都督俱討徐州

二年正月五原降戶鮮于修禮反於定州號魯興元年詔左光祿大夫長孫稚為使持節假驃騎將軍大都督北討諸軍事與都督河間王琛率眾討之

六月降蜀陳雙熾聚眾反自號始興王詔假鎮西將軍都督長孫稚討平之

三年正月梁將湛僧珍圍東豫州詔散騎常侍元暉為都督以討之是月梁又遣將彭羣王辯等率眾數萬逼瑯邪詔青州南青州討之是月以四方未平詔內外戒嚴將親出討

二月東郡民趙顯德反殺太守裴煙自號都督立其兄子為太守詔都督李叔仁討之

四月

是月梁將成景雋

寇彭城詔員外常侍崔孝芬為行臺率將擊走之三月  
齊州廣川民劉均執清河太守邵懷聚眾反自署大行  
臺清河民房須自署大都督屯據昌國城詔都督李叔  
仁討平之

八月詔都督源子邕李軌裴衍等討葛榮

十月雍州刺史蕭寶寅據州反自號曰齊年稱隆緒詔  
尚書右僕射長孫稚討之

武泰元年二月羣盜燒劫鞏縣以西關口以東公路澗

以南詔武衛將軍李神軌為都督討平之

孝莊建義元年五月梁遣將曹義宗寇荊州以中軍吏部尚書費穆為使持節都督征南諸軍事節度荊州刺史王羅以討之是年万侯醜奴僭大號除左衛將軍爾朱天光都督雍岐二州諸軍事雍州刺史率大都督武衛將軍賀拔岳大都督侯莫陳悅等以討醜奴擊走之六月幽州平北府主簿河間邢杲率河北流民十餘萬戶於青州之北海自署漢王年號天統以征東將軍李



叔仁為車騎大將軍率眾討之

七月光州人劉舉聚眾數千反於濮陽自稱皇武大將軍詔大都督宗正珍孫率南廣州刺史都督鄭先護討破平之

九月詔太尉公上黨王天穆討葛榮次於朝歌之南是月柱國大將軍爾朱榮率騎七萬討葛榮於滏口破擒之餘眾悉降

永安元年十二月詔行臺于暉迴師討邢杲次於歷下

二年三月詔大將軍上黨王天穆與渤海王高歡討邢

杲

四月大破  
之杲降

三年正月東徐州城民呂文欣王赦等殺刺史元大賓

據城反以撫軍將軍都官尚書樊子鵠兼右僕射為行

臺督征南將軍都督賈顯智征東將軍徐州刺史嚴思

遠以討之

三月東  
徐平

七月爾朱世隆據河橋逼京邑將軍李苗以大船焚河

橋世隆退走詔大都督兼尚書僕射行臺源子恭率步

騎一萬出西道行臺楊昱領都督李侃希等募勇士八千從東路防討之子恭仍鎮太行丹谷

後周武帝保定三年九月詔柱國楊忠率騎一萬與突厥伐齊十二月遣太保鄭國公達奚武率騎三萬出平陽以應楊忠

天和二年閏六月陳湘州刺史華皎率衆來附遣襄州總管衛國公直率柱國綏德公陸通大將軍田弘權景宣元定等將兵拔之因而南伐

宣帝以宣政元年六月即位十二月以上柱國河陽總管滕王道為行軍元帥率衆伐陳免京師見徒竝令從軍

大象元年九月以上柱國鄖國公韋孝寬為行軍元帥率行軍總管祝國公亮郟國公梁士彥以伐陳

十一月韋孝寬拔壽陽祝國公亮拔黃城梁士彥拔廣陵陳人退走於是江北盡平

隋高祖開皇元年九月以上柱國薛國公長孫覽上柱

國宋安公元景山竝為行軍元帥以伐陳仍命尚書左僕射高頰節度諸軍事帝謂頰曰我為百姓父母豈可限一衣帶水不拯之乎命大造戰船人請密之帝曰吾將顯行天誅何密之有使投棹於江若彼能改吾又何

求

二年正月陳遣使請和遂班師

八年三月詔曰昔有苗不賓唐堯薄伐孫皓僭雲晉武行誅有陳竊據江表逆天暴物朕初受天命陳頊尚存思欲教之以道不以恭行為令往來修睦望其遷善時

日無幾釁惡已聞厚納叛亡侵犯城戍句吳闔越肆厥  
殘忍于時王師大舉將壹車書陳頊反地收兵深懷震  
懼責躬請約俄而致殞矜其喪禍仍詔班師叔寶承風  
因求繼好載佇克念且敦行李每見珪璪入朝輶軒出  
使何嘗不殷勤曉諭戒以維新而狼子之心出而彌野  
威侮五行怠棄三正誅剪骨肉夷滅才良據手掌之地  
恣溪壑之欲劫奪閭閻資財俱竭驅蹙內外勞役弗已  
徵責子女擅造宮室日增月益止足無期帷薄嬪媵有

踰萬數寶衣玉食窮奢極侈淫樂飲酒俾晝作夜斬直  
言之客滅無罪之家剖人之肝分人之血欺天造惡祭  
鬼求恩歌舞衢路酣醉宮闈盛粉黛而執干戈曳綺羅  
而呼警蹕躍馬振策從旦至昏無所經營馳走不息負  
田持技隨逐徒行追而不及即加罪譴自古昏亂罕或  
能比介士武夫饑寒力役筋髓罄於土木性命俟於溝  
渠君子潛逃小人得志家家隱殺戮各各任聚斂天災  
地孽物怪人妖衣冠鉗口道路以目傾心翹足誓言告於

我日月以冀文奏相尋重以背德違言搖蕩疆場巴峽  
之下海澨已西江北江南為鬼為蜮死隴窮發掘之酷  
生居極攘寇之苦抄掠人畜斷截樵蘇市井不立農事  
廢寢歷陽廣陵窺覷相繼或謀圖城邑或劫剝吏人晝  
伏夜遊鼠竊狗盜彼則羸兵弊卒來必就擒此則重門  
設險有勞藩捍天之所覆無非朕臣每關聽覽有懷傷  
惻有梁之國我南藩也其君入朝潛相招誘不顧朕恩  
士女深迫脅之悲城府致空虛之嘆非直朕居人上懷



此無忘既而百辟屢以為言兆庶不堪其請豈容隱而不誅忍而不救近日秋始謀欲弔民益都樓船盡令東驚便有神龍數十騰躍江流引伐罪之師向金陵之路船住則龍止船行則龍去四日之內三軍皆覩豈非蒼旻愛人幽明展事降神先路協贊軍威以上天之靈助勘定之方便可出師授律應機誅殄在斯舉也永清吳越其將士粮仗水陸資須期會進止一准別勅初帝將伐陳有事於太廟命晉王廣秦王俊清河公楊素竝為

行軍元帥於是廣出六合俊出襄陽素出信州荊州刺  
史劉仁恩出江陵宜陽公王世積出蘄春新義公韓擒  
虎出廬江襄邑公賀若弼出吳州落藪公燕榮出東海  
合總管九十兵五十一萬八千皆受晉王節度東接蒼  
海西拒巴蜀旌旗舟楫橫亘數千里詔購陳叔寶位上  
柱國萬戶公乙亥行幸定城陳師誓衆

煬帝以仁壽四年七月即位八月并州總管漢王諒舉  
兵反詔尚書左僕射楊素右武衛大將軍周羅暉討平

之

大業九年六月楊玄感反遣右翊衛大將軍宇文述與左候衛將軍屈突通等馳傳發兵以討之七月破玄感於閩鄉斬之餘黨平

十年四月彭城賊張大彪聚眾數萬保懸薄山為盜遣榆林太守董純擊破斬之

十二月賊率孟讓眾十餘萬據都梁宮遣江都郡丞王世充擊破之盡虜其眾

十一年十二月詔民部尚書樊子蓋發關中兵討絳郡賊敬盤陀柴保昌等

十二年九月東海人杜楊州沈覓敵等作亂衆至數萬遣右禦衛將軍陳稜擊破之

十三年二月朔方人梁師都殺郡丞唐世宗據郡反自稱大丞相遣銀青光祿大夫張世隆擊之

三月廬江人張子路舉兵反遣右禦衛將軍陳稜討平之是月賊帥李通德衆十萬寇廬江遣左屯衛將軍張

鎮州擊破之



冊府元龜卷一百二十一